

AWIG - AWIG
DESA ADAT SIBANGKAJA
KECAMATAN ABIANSEMAL ,KABUPATEN BADUNG
1992 - 2018



Sabran Rakita Utara

PUPUT KAUAH - UWUHIN TUR KASOBYAHANG
RING RAHINA :
SANISCARA KLIWON WUKU WARIGA (5 MEI 2018)

Murdha Citta

“ Om Swastyastu “

Saking asung kerta waranugraha Ida Sang Hyang Paramakawi , Awig-awig lan Perarem Desa Adat Sibangkaja prasida puput ka uwah-uwuhin wastu sida sampurna, sane kadasarin antuk daging sastra agama hindu miwah catur dresta sane sampun ketah mamargi ring Desa Adat Sibangkaja.

Malarapan antuk pakayun gilik saguluk, nginggilang patitis jagat utamannyane kasukertan Desa Adat manut Tri Hita Karana, tan kasusupan antuk babuwatan niri-niri utawi patunggilan, pinaka sepat siku-siku tat kala nepasin wicara sane majalaran antuk pabligbag para dulu-dulu lan pamucuk Prawartaka mekadi : Bandesa Adat saha pengabih, Angga Kerta Desa, Prajuru dinas ,Adat lan Patus suwang-suwang banjar sawawidangan Desa Adat Sibangkaja ,taler para panglingsir sane kainggilang , wastu sida antar tur sampun ngawit kasobyahang ring rahina : Saniscara Kliwon Wuku Wariga (Tgl, 5 Mei 2018), pinaka pidabdab sane kaping 4 (empat) sajeroning nguwah – nguwuhin daging Awig-awig lan pararem puniki sane sampun mayusa 22 (kalih likur) warsa ngawit saking rahina Soma Keliwon Uye, tgl 2 Maret 1992. Dwaning sampun kabawos sampurna patut puniki kamargiang antuk Prajuru Desa lan Prajuru Banjar rikala nitenin utawi micayang pamutus manut kasingsalan krama sane nungkasin daging Awig-awig puniki. Kawon becik utawi manut tan manut patut memargi sajeroning 5 (limang warsa) nyantos paruman desa tat kalaning pacang malih nguwah – nguwuhin manut pakibeh jagat sane pacang rawuh.

Dumogi prasida mangguh kasukertan , santa lan santhi sidaning don,
“ Ksayanikang papa nahan prayojana”.

“ Om Santhih Santhih Santhih Om”

Daging pinaka bantang Awig – awig Desa Adat Sibangkaja :

MURDHA CITTA.....	i
Daging maka bantang Awig-awig Desa Adat Sibangkaja.....	ii
SARGA I ARAN LAN WEWIDANGAN.....	1
SARGA II PATITIS LAN PAMIKUKUH.....	1
SARGA III SUKERTA TATA PAKRAMAN.....	2
Palet 1 Indik Krama.....	2
Palet 2 Indik Prajuru Desa.....	6
Palet 3 Indik Kulkul.....	9
Palet 4 Indik Paruman.....	10
Palet 5 Indik Druwen Desa.....	11
Palet 6 Indik Sukerta lan Pamitegep.....	13
SARGA IV SUKERTA TATA AGAMA.....	20
Palet 1 Indik Dewa Yajnya.....	20
Palet 2 Indik Resi Yajnya.....	25
Palet 3 Indik Pitra Yajnya.....	26
Palet 4 Indik Manusa Yajnya.....	31
Palet 5 Indik Bhuta Yajnya.....	31
SARGA V SUKERTA TATA PAWONGAN.....	33
Palet 1 Indik Pawiwahan.....	33
Palet 2 Indik Balu lan Nyapihan.....	38
Palet 3 Indik Sentana.....	40
Palet 4 Indik Warisan.....	42

SARGA	VI	WICARA LAN PAMIDANDA.....	43
		Palet 1 Indik Wicara.....	43
		Palet 2 Indik Pamidanda.....	44
SARGA	VII	NGUWAH - NGUWUHIN AWIG – AWIG.....	45
SARGA	VIII	PAMUPUT.....	47

SARGA I
Pawos 1
ARAN LAN WEWIDANGAN

1. Desa Adat puniki mewasta Desa Adat Sibangkaja.
2. Jebar wewidangan nyatur Desa mekadi ring sor :
 - a. Sisi kangin : Telabah yeh lauh
 - na Sisi kauh : Telabah Padang luwah
 - ca Sisi kaja : Wewidangan Banjar Sangging lan Panegalan pitu .
 - ra Sisi kelod : Wewidangan Banjar Piakan.

(Wates wewidangan ring ajeng kajangkepin antuk gambar (peta) ring Ilikita)
3. Desa Adat Sibangkaja kawangun antuk karang ayahan Desa Kaepah dados 7 Banjar Adat, minakadi :
 - a. Banjar Adat Piakan
 - Na.Banjar adat Sintrig
 - Ca.Banjar adat Lambing
 - Ra.Banjar adat Sangging
 - Ka.Banjar adat Lateng
 - Da.Banjar adat Tengah
 - Ta.Banjar adat Saren
4. Banjar Adat patut ka epah dados tempekan-tempekan .
5. Banjar Adat patut ngardi pararem sane mauger-uger antuk awig-awig Desa Adat Sibangkaja
6. Banjar patut madruwe piranti mekadi : Bale banjar, Palinggih Padmasana, lan bale kulkul.

SARGA II
Pawos 2
PATITIS LAN PAMIKUKUH

Desa Adat Sibangkaja ngamanggehang :

1. Pancasila lan Panca Srada
2. Undang-Undang Dasar 1945

[Type text]

3. PERDA Propinsi Bali No. 3 tahun 2001 tentang Desa Pekraman
4. Tri Hita Karana manut Tatwaning Bhuwana Agung.

Paos 3

PATITIS DESA

Patitis Desa Adat Sibangkaja, kadi ring sor :

1. Mikukuhin, ngrajegang, ngemanggehang Agama Hindu
2. Nginggilang prawertining desa, saha pawongania sekala lan niskala
3. Nglimbakang linging (kecap) sastra Agama Hindu
4. Ngrajegang kasukertaning Desa Adat, saha pawongania sekala lan niskala
5. Nincapang pangeweruh, kasusilan lan pangupajiwa.

SARGA III

SUKERTA TATA PAKRAMAN

Palet 1

Pawos 4

INDIK KRAMA

1. Sane kabawos krama Desa Adat Sibangkaja, sang sane maagama Hindu, kakuwub wiadin ngamong tur malinggih ring sajeroning Karang Ayahan Desa.
2. Prade sang jumenek ring kekuwub Desa Adat Sibangkaja sane tan meagama Hindu, patut keni Batu-batu manut perarem.
3. Sang sane mawit saking Desa Adat sibangkaja madruwe pasayuban siosan ring karang ayahan desa jumenek ring wewidangan Desa Adat Sibangkaja, tur sampun ngwangun pelinggih kemulan taksu (rong tiga), patut tedun mekrama Desa Adat Sibangkaja. Yening ngwangun pelinggih penyawangan luput saking pawilangan Inucap ring ajeng. Yening tan tedun makrama, rikala wenten kalayu sekar ring pesayuban inucap patut mewali ka umah asal ipun.
4. Sang sane mawit saking Desa Sibangkaja sangkaning kabanda antuk 2 (kalih) Desa Adat (Desa Adat Sibangkaja lan Desa Adat Lambing Sibangkaja), nganinin pawos 4 (patpat) wilangan 3 (tiga), patut katitenin pidabdabnyane ring Desa Adat suwang-suwang.

[Type text]

5. Sang dura desa sane jumenek ring Desa Adat Sibangkaja sangkaning numbas tanah saha madruwe wewangunan utawi pasayuban, mangda tedun makrama Desa Adat Sibangkaja.
6. Wong dura desa sane mausaha (Pengusaha) ring Desa Adat Sibangkaja keni batu-batu nyabran warsa, manut perarem.
7. Piolihan manut pawos 4 (patpat) wilangan 5 (lima) manut perarem.
8. Sang sane tan jumenek nglantur ring Desa Adat Sibangkaja kawastanin tamiu.

Dharmaning tamiu kadi ring sor :

- a. Patut masadok utawi kasadokang ring prajuru adat, sakirang kirang ipun arahina (1 x 24 jam) olih sang sane nerima tamiu punika.
- na. Tamiu punika patut jangkep makta ilikita, minakadi surat-surat pengenal, prade tan makta ilikita lan sapanunggilan ipun tan dados katerima. Yan mamurug patut kasukserahang ring sang ngawiwenang.
- ca. Patut ngaturang batu - batu ring Desa Adat Sibangkaja, batu - batu punika ka epah tiga, asiki katur ka Desa Adat, sane kakalih katur ring Banjar Adat genah tamiu punika masayuban.
- ra. Agung alit batu-batu punika manut wit kramane, makadi : krama tios Bali Rp50.000, krama Bali Rp. 10.000. Sejabaning kari masekolah.
- ka. Patut sareng masidi krama (nedunin) ri kalaning wenten pakaryan marerisak utawi gotong royong.
- da. Patut satinut ring sadaging awig-awig Desa Adat Sibangkaja
- ta. Polih pasayuban ri kalaning kapanca baya

Pawos 5

PAWILANGAN KRAMA

Bacakan krama wenten petang soroh kadi ring sor :

1. Krama Ngarep : Wong desa sane nanggap karang desa
2. Krama Panyade : Wong desa sane wenten dedandanan waris saking krama Ngarep.

[Type text]

3. Krama Paron : Wong sane mawit saking krama ring ajeng utawi penyade tur sampun madruwe pumahan, sanggah utawi pamrajan, sanistan ipun kemulan taksu.
4. Krama Pangele : Wong desa saking dura desa sane kakuwub nempel, palas ring krama ngarep.

Pawos 6

NGRANJING DADOS KRAMA

1. Ngranjing dados krama kadi ring sor :
 - a. Sangkaning pinunas ngaraga
 - na. Sangkaning ngamong karang ayahan desa
 - ca. Sangkaning pawiwahan
 - ra. Sangkaning ngwangun paumahan ring wewidangan Desa Adat Sibangkaja, manut sarga 3 palet 1 paos 4 no. 2
2. Dharmaning krama kadi ring sor :
 - a. Nyejerang saha tinut ring daging awig-awig Desa Adat Sibangkaja miwah daging pararem.
 - na. Bakti miwah sutindih ring Desa Adat Sibangkaja.
 - ca. Natak panes-tis sane merupa ayah, urunan, papeson, lan ngardi kasukertan desane sekala lan niskala.
3. Kapatutan Krama
Krama desa polih pesayuban ri kalaning katiben panca baya, indike punika patut katitenin olih Prajuru Desa lan Prajuru Banjar.

Pawos 7

PANUMAYA NGAWITIN TEDUN MAKRAMA DESA

Ngawitin tedun ngranjing dados krama nganutin sengker ngawarsa ngawit ring sasih kasanga.

Pawos 8
AYAH LAN URUNAN

1. Ayah Ngarep
 - a. Krama ngarep patut ngamedalang ayahan lan urunan mepek
 - na. Krama manut pawos 5, nomor 2, 3, lan 4, ayah miwah urunan ipun kamanggehang manut pararem desa utawi banjar.
 - ca. Krama sane madruwe rabi langkungan ring 1 (siki) keni ayah manut perarem.
2. Ayah Balu

Bacakan balu wenten kalih soroh inggih punika :

 - a. Balu nglintik teges ipun balu sane tan madruwe ayah penyande utawi pangele, patut keni ayah saparo (setengah). Yaning ipun balu Luh keni ayah luh kemanten, munguwing urunan keni mepek sejaba reramon, asapunika teller balu muani, ayahan muani kemaon tur urunan mepek.
 - na. Balu ngempu teges ipun balu sane madruwe ayah penyade utawi pengele manut pawos 5. Ayah lan urunan balu inucap ngamedalang mepek.
3. Luput Ayah lan Luput Prabeya.

Sane polih luput ayah manut perarem.

Pawos 9
MAPUANGKID, MASUSUKAN, NUMBAS AYAH

1. Kramane kadadosang mapuankid santukan sungkan, matepetin, maleluasan, lamania mapuankid kasukserah ring prajuru nganutin babuatannyane.
2. Krama sane mayusa 65 warsa nenten madruwe penyade sane pacang nyuksukin nenten keni ayah lan urunan, sakemaon sesampun kelayu sekar karang lan sedagingnyane ke serahang kebanjar, sedereng polih luput ring banjar sekadi ring ajeng kariinin antuk nitenin indik warisnyane sane dados tur patut, masengker awarsa. Prade tan wenten sane ngwarisin, indik pangupa jiwa selanturnyane kasanggra antuk banjar.
3. Kengin numbas ayah, santukan dados para yogia miwah sane lian lianan tur sampun kapatutang antuk paruman krama. Agung alit panumbas ayahe punika manut paswara banjar (dados numbas ayah).

Pawos 10

WUSAN DADOS KRAMA

1. Wusan dados krama sangkaning pinunas ngraga, santukan kesah ka dura desa utawi Negara miwah sane sios - siosan.
2. Kanorayang, duaning tan prasida ngesehin solah, maprawerti ngawe biuta, lan nungkasin daging awig-awig Desa Adat / Banjar miwah pararem –pararem.
3. Kaputungan, yening ayah ngarep, patut ngwaliang ayahan karang punika ka Desa Adat, semaliha tan polih pah-pahan padruwen desa.

Palet 2

Pawos 11

INDIK PRAJURU DESA

1. Bendesa Adat punika manggala desa, patut urati tur prasida ngenterang pamargin adate ring desa pakraman.
2. Kelihan Banjar Adat lan Patus, pinaka manggala adat ring Banjar Adat, patut urati ring saparindikan adate ring wawengkon Banjar Adat.
3. Bendesa Adat wiadin Kelihan Banjar Adat lan Patus, patut mawit saking krama ngarep sane sampun mayusa 21 warsa utawi sampun marabian.
4. Kadegang utawi kapilih, malarapan antuk pilihan krama desa utawi krama banjar, nganutin tata titining pamilihan salami 5 warsa sajawaning wenten paetangan sios.
5. Ngawit ngadegang prajuru Desa, mekadi Bendesa Adat lan Angga Kerta Desa patut ngaturang upasaksi ring Pura Desa ,kadulurin antuk pawintenan rikalaning Piodalan jelih ring Kahyangan Tiga.

Pawos 12

PENGABIH BENDESA ADAT

Bendesa adat ka abih olih :

1. Patajuh utawi pangliman pinaka wakil bendesa Adat
2. Penyarikan utawi sekretaris pinaka juru tulis
3. Paetangan utawi bendahara pinaka pangraksa druwen desa
4. Angga kerta akeh ipun manut kawigunan
5. Kasinoman punika juru arah, akehnyane manut kawigunan

[Type text]

6. Pecalang Desa Adat Sibangkaja, akehnyane 14 diri mawit saking utusan suwang-suwang banjar 2 diri, parikrama ngadegang pecalang manut kadi pawos 11 wilangan 5 ring ajeng.

Pawos 13

SWADHARMANING BENDESA ADAT MIWAH

KELIHAN BANJAR ADAT , KELIHAN PATUS LAN PECALANG.

1. Bendesa Adat lan prajuru desa patut ngenterang, ngamargiang, saha nglimbakang sadaging awig-awig Desa Adat ring kramane sami.
2. Nuntun, ngenter krama desane ngupadi patitis manut pawos 3.
3. Maosang saha niwakang pamutus wicara, mekadi :
 - a. Yan sang mawicara sajeroning Desa Adat Sibangkaja, patut Bendesa Adat sane micayang pamutus.
 - na. Yan sang mawicara sajeroning Banjar Adat, patut katepas antuk prajuru banjar adat.
 - ca. Prade tan prasida katepas wicara inucap ring banjarnyane, patut kalanturang ring Kelihan Dinas, Perbekel ngelantur ring sang ngawiwenang.
4. Prade sang mawicara tan cumpu ring pemutus Bendesa Adat utawi ring pamutus Kelihan Banjar Adat patut katumusang ring sang ngawiwenang.
5. Bendesa Adat utawi Kelihan Banjar Adat lan Patus, rikala nepasin wicara mangdane keabih sakirang-kirang ipun kalih diri, seakeh-akeh ipun petang diri sane marupa Angga Kerta ring Desa Adat utawi Banjar Adat. Kautsahayang mangda kasarengin antuk Perbekel.
6. Angga Kerta utawi panyanggra ring ajeng, kasudi antuk Bendesa Adat, kasarengan antuk Kelihan Banjar Adat lan Patus pinaka pengabih inucap.
7. Wicara sane patut kabawosang yening wenten krama desa sane nungkasin daging awig-awig lan perarem.
8. Pinaka prajuru desa patut ngriinin ngawentenang pakeling matemuang baos ring sang sane mawicara.
9. Prade prajuru iwang panglaksana tur nungkasin daging awig-awig, prajuru inucap keni danda nikel ring kaiwangan suwang-suwang krama.
10. Swadharmaning Pecalang :
 - a. Nganutin ilikita marupa tuntunan saking Majelis Agung, Majelis Madya lan Majelis Alit rikala nitenin kasukertan sajebag Desa Adat Sibangkaja.
 - b. Satinut ring daging awig-awig lan perarem Desa Adat Sibangkaja.

[Type text]

- c. Ngemargiang paswara manut titah Bendesa Adat mratiyaksayang pakibeh sawewidangan Desa Adat Sibangkaja.

Pawos 14

PETUAS OLIH-OLIHAN PRAJURU DESA, PRAJURU BANJAR LAN PECALANG.

1. Luput pepeson lan urunan. Sakewanten yan urunan wewangunan ring Kahyangan Tiga mamargi tetep.
2. Pituas utawi pikolih Bandesa , Angga Kerta Desa lan Prajuru Banjar adat lan Patus : polih busana lan jinah ngawarsa (1 tahun) pisan, nganutin piolihan saking LPD Sibangkaja.
3. Prade wenten prajuru kelayu sekar sakantune dados prajuru, polih pituas saking Desa Adat manut peraem.
4. Prajuru sane sampun pari purna puput ayah taler kaaturang pituas manut perarem.
5. Pituas olih-olihan Pecalang Desa adat Sibangkaja :
 - a. Manut perarem.
 - na. Manut perarem.

Pawos 15

PRAJURU LAN PECALANG KAGENTOSIN

Prajuru kagentosin santukan :

1. Seda utawi kalayu sekar
2. Duaning sampun panumaya manut kadi paos 11 nomor 4
3. Sangkaning pinunas ngraga
4. Kanorayang ri antukan nilar sesana, makadi nenten ngamargiang daging awig-awig Desa Adat.
5. Nganorayang wiadin ngentosin , patut sajeroning paruman tur mangda kasungkemin olih krama.

PECALANG KAGENTOSIN :

1. Seda utawi kalayu sekar.
2. Pecalang satinut ring yusan Bendesa Adat keadegang (5 warsa), patut kagentosin yan sampun panumaya.
3. Kagentosin utawi kanorayang pateh kadi wilangan 4 , 5 ring ajeng rikala Prajuru kagentosin.

Palet 3
Pawos 16
INDIK KULKUL

1. Kulkul Desa Adat Sibangkaja wenten 3 soroh, kadi ring sor :
 - a. Kulkul Desa Adat
 - na. Kulkul Banjar Adat
 - ca. Kulkul Tempekan utawi sekaa
2. Tabuh utawi tatepakan kulkul Desa Adat kadi ring sor :
 - a. Atulud banban nyihnayang wenten pakaryan utawi paruman Desa Adat
 - na. Atulud banban kadulurin nungting nyihnayang upacara piodalan ring Kahyangan mamargi.
 - ca. Atulud bulus, tetenger wenten kapanca baya.
3. Tetengeran kulkul suang-suang banjar kadi ring sor:
 - a. Tigang tulud bulus nglantur, makacihna wenten kapanca baya ngamuk, kabaak, sane kapikayun mabaya pisan.
 - na. Kalih tulud bulus, cihna wenten kapanca baya ngamuk, nanging dereng mayanin.
 - ca. Atulud bulus, cihna wenten kapanca baya kicalan artha brana, anyud miwah sane siosan,
 - ra. Atulud bulus saha nglantur nungting , maka cihna wenten kapanca baya umah puun.
 - ka. Atulud banban, cihna wenten paruman ring banjar utawi wenten pakaryan.
 - da. Tigang klentungan alon, cihna wenten kicalan daa utawi nganten.
 - ta. Kalih tulud ngambat utawi banban, maka cihna wenten silih sinunggil kramane kalayu sekar, maka pengawit kramane keneng cuntaka sejawaning sang Sulinggih sane lebar utawi seda tan keneng cuntaka.

PAKELING :

Indik suwaran kulkul nganinin sang Sulinggih lebar, memargi manut kadi wilangan ta ring ajeng nanging tan nyuntakain (krama nenten keni sebel).

4. Kulkul Katepak kadi ring sor :
 - a. Kulkul Desa utawi banjar katepak sangkaning pituduh Prajuru Desa Utawi Banjar.
 - na. Sang nepak kulkul sangkaning katiben baya, kapatutang tan pasadok ring prajuru, nanging sesampune wusan nepak, wawu raris masadok ring prajuru.
 - ca. Krama desa wiadin krama banjar patut nedunin, yening wenten suara kulkul manut tengeran lantur lumaksana , katuntun antuk prajuru Desa utawi banjar.

[Type text]

- ra. Yening wenten suaran kulkul matetenger kapanca baya, mangda katedunin antuk krama lanangnyane, saha gegawan nuju genah sane kapanca baya.

Pawos 17

KULKUL KATEPAK TAN SANGKANING GUMANTI

Kulkul katepak antuk jadma sane mamanah iseng utawi tan gumanti, jadma punika patut kadenda manut pararem.

Palet 4

Pawos 18

INDIK PARUMAN LAN TATA TITINING PARUM

1. Indik Parum kadi ring sor :
 - a. Paruman nadak, krama patut nedunin , duaning wenten baos mabuat
 - na. Paruman Agung, kewentenang 5 warsa sapisan, babuatannyane maosang indik nguwah-nguwuhin daging awig-awig manut kawigunan lan aab jagat.
 - ca. Peparuman satunggil awarsa nyabran sasih kasanga, maosang indik munjuk lungsur krama desane (paos 7).
 - ra. Peparuman ngasasih sapisan, maosang indik druen desa utawi banjar miwah sane siosan manut kawigunan ipun ring banjar suang-suang.

2. Tata titining Parum kadi ring sor :
 - a. Sang sane ngamiletin parum patut mabusana adat : mawastra, maamed jangkep ring destar.
 - na. Ri kanjekan parum, patut ngaturang canang pengrawos lan saruntutan ipun, magenah ring ajeng sang mabawos, taler matur piuning ring Ida Sang Hyang Widhi, pamekas ring Ida Bagawan Penyarikan, ring bale desa, bale banjar rauh bale kulkul. Sesampune prajuru ngaturang canang pengrawos, ngelantur ngawitin peparuman.
 - ca. Ngawitin parum, patut kariinin antuk pangastungkara malarapan antuk panganjali, sane katuntun antuk prajuru pinaka pamucuk paruman, sapunika taler ring pamuput paruman kapuputang antuk ngaturang parama santi.
 - ra. Rikala paruman kemargiang ,tan kedadosang ngamedalang bawos sane kawon mekadi : ujarpara, mamisuh ,cemer lan sapanunggilan ipun.

[Type text]

ka. Tatepasan parum pinake paneges, patut kasurat tur kasobyahang ring kramane pinaka panguntat peparuman punika.

da. Prade silih sinunggil pamilet parum ngamedalang bawos kadi wilangan ra ring ajeng patut keni pecamil marupa danda manut perarem.

Pawos 19

PARUMAN SIDA KAMARGIANG

Paruman Desa utawi paruman banjar prasida kamargiang, sasampune kamiletin antuk krama desa / banjar lintangang ring saparo pamilet, asapunika taler panepas paruman sinanggeh pastika sah yening sampun katepas antuk pamilet parum lintangan ring saparo.

Pawos 20

KEPUTUSAN SINANGGEH SAH

Keputusan utawi tatepasan sane kategesang, prasida kasahang tur sampun kasungkemin antuk lintangan ring saparo.

Palet 5

Pawos 21

INDIK DRUWEN DESA

Padruwen Desa kadi ring sor:

1. Pura Desa,
2. Pura Puseh,
3. Pura Dalem
4. Pura Prajapati
5. Pura Demung
6. Pura Taman Beji
7. Setra
8. Wantilan Desa Adat
9. Karang Ayahan Desa
10. Panegalan / Pelaba Desa
11. L.P.D Desa Adat Sibangkaja
12. Tanah Lapangan Ngurah Rai Sibangkaja.

[Type text]

13. Piranti-piranti sane wenten sejeroning kahyangan
14. Saluiring druwen Desa Adat Sibangkaja, patut wenten ilikitania, samaliha tan kalugra ngadol, ngadeang, yan tan kasungkemin antuk krama sami.
15. Saluir druwen Desa Adat Sibangkaja, manawita wenten tanah druwen Desa Adat katukar antuk pemerintah, mangda janten kawentenan ipun, saha kasiarang ring krama Desa Adat.
16. Pura Demung , Pura Taman Beji lan lapangan Ngurah Rai kasungkemin lan kaempon olih 2 (kalih) Desa Adat inggih punika : Desa Adat Lambing Sibangkaja lan Desa Adat Sibangkaja.
17. Indik Prabeya nganinin wilangan 16 ring ajeng, inggian piolihan lan urunan ka epah dados 8 (kutus), 7 (pitu) pahan kasuksara olih karma adat Sibangkaja, sane 1 (siki) epahan kasuksara olih krama Adat Lambing Sibangkaja.
18. Indik Pura Taman Beji :
Suang-suang krama sajabag Desa Sibangkaja kedadosang ngabejiang ring Pura Taman Beji rikala ngawentenang upacara Dewa Yadnya.

Pawos 22

OLIH-OLIHAN DESA ADAT SIBANGKAJA

1. Olih-olihan Desa Adat Sibangkaja kadi ring sor :
 - a. Pamupon panegalan druwen desa adat Sibangkaja.
 - na. Urunan utawi pepeson krama desa
 - ca. Saking pikolih LPD
 - ra. Dana Punia
 - ka. Polih wantuan saking Pemda Tingkat II Badung
 - da. Polih wantuan saking Provinsi Bali
 - ta. Miwah sane siosan
2. Olih-olihan inucap ring ajeng dados kaanggen prabea ngamecikang wewangunan druwen Desa Adat, makadi kahyangan lan wantilan taler kaangge ring nuju piodalan
3. Prajuru desa patut ngetang olih-olihan inucap manut kawigunan, taler mangda manut ring paswara.

Palet 6
SUKERTA LAN PAMITEGEP
Kaping 1
Pawos 23
KARANG, TEGALAN LAN SAWAH

1. Pawilangan karang wenten kalih soroh, kadi ring sor :
 - a. Karang ayahan Desa (PKD)
 Karang tegalan wiadin teba, inggih punika tanah sane kautsahayang olih krama kaanggen ngrereh pangupajiwa
 - na. Karang kedi utawi gunakaya tur wenten ilikitan ipun :
 Yan wenten krama wiadin sane siosan ngrereh pasayuban ka tegalannyane utawi ka sawah taler ka teba, tur sampun makarya angkul-angkul, taler makarya kemulan taksu (Rong tiga) krama inucap patut keni ayah ngarep, (sajawaning wenten paetangan sios).
2. Sapasira ugi sane jagi numbas karang ayahan druwen Desa Adat Sibangkaja, patut sang sane numbas karang inucap tedun makrama Desa Adat ring Desa Adat Sibangkaja.
3. Sang ngamong karang utawi panegalan patut ngawentenan wates marupa tembok wiadin pagehan.
4. Karang wiadin panegalan patut magaleng kaluwanan artos ipun :
 Magelang kaler wiadin kangin, sane ngardinin wates patut sang sane madruwe karang utawi tegal ring tebanan (sane badauh utawi badelodan.)
5. Yening wenten karang kabebeng, patut dane prajuru ngutsahayang mawosang mangda prasida wenten margi.
6. Sane kabawos margi inggih punika, wewidangan sane kaanggen mamargi antuk krama, sane mawates antuk tembok utawi pagehan pakarangan sabilang samping ipun manut kasumanggeman.
7. Yening wenten krama ngentasang wangken jadma ring pekarangan, penegalan lan carik anak sios, patut sang nruwenang sawane punika mrayascita lan nyarunin genah punika, agung alit ipun manut pararem lan dresta. Pamargin caru miwah prayascita punika dados kamargiang ring pakarangan, panegalan utawi sawah sane keentasin, taler kapatutang ring pempatan margine, ri wus punika margiang raris tirta panglukatan pebersihan lan sane siosan.

[Type text]

8. Yening wenten jadma kalayu sekar ring pekarangan, tegalan sawah anak siosan, patut sang madruwe sawa punika nyarunin tur mamarayascita genahe punika, agung alit ipun manut dresta lan sastra agama hindu.
9. Yening wenten jadma sios padem ring wawengkon jagat Sibangkaja tan wenten sane ngangkenin, prajuru Desa Adat patut nyadokang ring sang ngawiwenang, makadi guru wisesa.

Pawos 24

TAN KAPATUTANG

1. Tan kapatutang ngadol ngilikitayang karang desa yadiastun sampun marupa sawah utawi tegalan, sejabaning karang kedi manut pawos 21 no.12 ring ajeng.
2. Tan kapatutan ngewangun / ngubu ring penampihan tukad pemekas tanah nenten mejanten (tanah GG) ring sewewidangan Desa Adat Sibangkaja.
3. Tan kapatutang parkir ring margi desa Trotoar langkungan ring 24 jam (nukuh) sejabaning wenten upacara agama.
4. Tan kapatutan maboros lan nuba seluwir sato, mina sejabaning ipun sane ngarugada (ngrusak / ngrusuh).
5. Tan kapatutan mamula, maduwe, ngengkebang, ngutsahayang ganja lan sapanunggilan ipun sane tan kapatutang saking guru wisesa.
6. Tan kapatutang ngalah-ngalahin karang wiadin tegalan miwah margi, taler genah sane sinanggeh suci makadi kahyangan, setra, lan sapanunggilan ipun.
7. Tan kapatutang ngembahang toya, mawit toyan hujan, toyan wewalungan toyan pawaregan lan sapanunggilan ipun kepekarangan anak sios.
8. Suang-suang krama patut maderbe kakus, tegas ipun patut ngaryanin kakus.
9. Tan kapatutan ngembahan toya, mawit sakeng toyan wewalungan, WC. Kamar mandi, lan sapanunggilan ipun kemargine.
10. Tan kapatutang nunjel ngutang luu, wangken wewalungan, kepekarangan anak siosan lan kemargine.
11. Tan kapatutan nunjel, nanem wangken jadme ring pekarangan utawi panegalan, yadiastun pekarangan utawi panegalan punika druwe ngrage sejawanin sang sane sampun medwi jati.
12. Tan kapatutan ngentungan tulang manusa ring pakarangan utawi panegalan.

[Type text]

13. Sang sapisira ugi sane wenten ring wewidangan Desa Adat Sibangkaja tan kapatutang ngwangun genah maseneng-seneng sane matuwuh lami (sifat permanen) minakadi :
- a. Warung sane nyajiang minum-minuman sane ngawinang punyah utawi mabuk
 - na. Warung (KV) sane nyajiang anak istri tuna susila (WTS)
 - ca. Yening wenten sane mamurug (1-9) kedanda manut perarem.
 - ra. Yening wenten sane mamurug (10-13) kedanda manut perarem.
14. Sang sapisira ugi sane ngadol, nglimbakang (pengedar), migunayang (pemakai) lan sane nyingidang (menyembunyikan) indik NARKOBA lan sapanunggilan ipun mangda katitenin olih Prajuru Desa lan Prajuru banjar, kasarengin antuk Pecalang. Selanturnyane mangda kasukserahang ring sang ngawiwenang.

Kaping 2

Pawos 25

PAPAYONAN

Indik papayonan kadi ring sor :

1. Ngawit nanem tanem tuwuh, patut kalih meter katengah utawi ngajroan sakeng tembok wates pekarangan.
2. Yening wenten kayu mentik ring sajeroning wates pekarangan, tur ngawetuang wicara, tarune punika patut kaebah antuk prajuru tur kabagi kadadosang tiga asiki katur kadesa, utawi banjar, sane kakalih kabagi antuk sang sane nruwenang wates.
3. Yening wenten entik-entikan makadi tiying miwah sapanunggilan ipun mentik ngalintangin wates, patut entik-entikan punika kataban, utawi kadruwenang antuk sang madruwe karang, sane kaentikin.
4. Yan wenten taru ngungkulin kapisaga, sang kaungkulin marasa keberatan patut masadok ring prajuru banjar, tur ngelantur ring Bendesa Adat sane patut niwakang pamutus kadi ring sor :
 - a. Sang nruenang taru punika patut notor utawi ngebah, tur mewaneng selamin ipun 2 wuku sampun kalaksanayang.
 - na. Yan jantos lintang ring sengker, durung kelaksanayang prajuru patut nibakang ring sang kataonin notor wiadin ngebah taru punika tur kasaksinin antuk prajuru.
 - ca. Saang utawi taru sane katotor wiadin kaebah punika kaambil antuk sang sane notor utawi ngebah

- ra. Yening wenten taru mayanin kapisaga tur sampun kasadokang ring prajuru, samalih sampun katitenin, kawiaktin ipun makadi :
- Wit ipun banget sendeh, sampun ganjih utawi padem.
 - Bungkil ipun tede tetani utawi umahin semut, lan sapanunggilan ipun prajuru patut niwakang ring sang nruenang taru ika mangda di gelis ngebah, masengker 7 rahina.
5. Yening wenten wit taru bah tur mayaning wewangun anak sios dereng utawi sampun naenin kasadokang ring sang sane madruwe taru punika, sang madruwe taru punika patut kadanda manut perarem.

Kaping 3

Pawos 26

WEWANGUNAN

Indik wewangunan kadi ring sor :

1. Saluwiring wewangunan mangda kautsahayang nganutin kecap sastra makadi Asta Bumi utawi Asta Kosala Kosali ninutin uger-uger saking guru wisesa.
2. Krama tan dados ngewangun ngalintangin wates wiadin tembok pakarangan, sajawaning wewangunan druwen banjar utawi desa sane sampun wenten utawi nami.
3. Yening wenten wewangunan sane nglintangin wates pakarangan, jantos ngawetuang wicara, sang kaberatan patut masadok ring prajuru banjar utawi desa, mangda prajuru desa niwakang kadi ring sor :
 - a. Ngicenin piteket rig sang madruwe wewangunan punika mangdane midabdabin wewangunan sane nglangkungin wates, masengker 14 rahina.
 - na. Yen prade sang madruwe wewangunan punika tan midabdabin utawi nguug wewangunan punika manut sengker ring ajeng ,prajuru patut niwakang nguug maksa, tur ipun tan polih prabiya papocolan utawi ganti rugi.
4. Prade wenten wewangunan katiben layangan lan sepenunggilan ipun kantos rusak patut sang sane ngrusak mecikang tur miyanin saha upakara manut dresta lan sastra agama hindu.
5. Sapasira ugi ngawangun karang paumahan anyar ring wewidangan Desa Adat Sibangkaja patut nyiagayang telajakan (paembang) senistan ipun adepa agung pinaka jelinjingan utawi got.

[Type text]

Kaping 4

Pawos 27

WEWALUNGAN, TATA CARA LAN OLIH-OLIHAN NABAN

1. Wewalungan :

- a. Warga desa sane miara wewalungan utawi ingon-ingon patut siaga nitenin, negul wiadin ngandangin mangda tan ngerusak ka pisaga, napi malih jantos ngranjing ka pura utawi ke mrajan.
- na. Yening wenten wewalungan ngeleb malumbar raris polih neda utawi ngerusak pamulan-mulan anak sios, sang nruwenang wewalungan punika patut kadanda tur kasisipang naur sapangargan entik - entikan sane kateda utawi rusak.
- ca.yening wenten wewalungan ngeleb tur kaetut uri antuk sang madruwe, prade polih neda entik-entikan,utawi ngranjing kagenah suci, sang madruwe tan keni danda, kewanten keni pamrayascita utawi nyarunin genah punika manut dresta sastra agama hindu.
- ra. Yening wenten wewalunagn ngeleb, nenten kaetut uri antuk sang Nruwenang, prade ngranjing ka genahe suci sang madruwe patut kadanda manut perarem.
- ka. Yening wenten wewalungan utawi ingon-ingon ri kala kataban mawastu padem tan sangkaning gumanti, tur wenten saksi sang naban (ngejuk) punika luput saking kaiwangan.

2. Tata cara Naban

- a. Pamargin naban wewalungan, sang naban patut saha saksi sakirang_ kirang ipun adiri. Wewalungan utawi ingon - ingon sane kataban punika patut kategul, utawi kadedehang, dagingin sawen tetanduran sane karusak tur bakta majeng ring prajuru banjar utawi desa.
- na.Yening wewalungan utawi ingon-ingon sane kataban punika jantos sarahina (24Jam) nenten wenten sane ngangkenin wewalungan utawi ingon -ingon punika patut katur ring sang ngawiwenang.
- ca. Selamin wewalungan punika kataban, prajuru sane ngraksa tetabanane punika patut nguwehin neda, pengargan tatedan tetabanane punika patut kaetang risampun wenten sane ngangkenin. Sang ngangkenin patut naur pangargan tetedane punika ring praiuru.
- ra, Sang ngangkenin patut ka danda manut perarem.

[Type text]

3. Olih - Olihan naban
 - a. Parjuru Polih asiki
 - na. Sang nruwenang abian polih asiki
 - ca. Banjar polih asiki
 - ra. Desa polih asiki

Kaping 5

Pawos 28

BHAYA

1. Bebacakan Panca Bhaya kadi ring sor
 - a. Geni bhaya utawi Puun
 - na, Artha bhaya inggih punika : kamalingan, kabaak (karampok) lan sane siosan.
 - ea, Jiwa bhaya utawi kaamuk / ngamuk, lan sapenunggalan ipun.
 - ra. Er bhaya utawi blabar agung lan sapenunggalan ipun
 - ka, Stri bhaya utawi kaplagandang.
2. Asing - asing krama desa kahanan utawi manggihin sang kahanan bhaya kadi ring ajeng patut nunas kanti utawi tulung nyuarayang kulkul Desa utawi Banjar manut palet 3 Pawos 16.

Pawos 29

MALING LAN RERUSAKAN

1. Yening wenten jadmamamaling utawi ngrusak, jadmapunika wit ipun saking Desa Adat Sibangkaja. utawi jumenek ring Desa Sibangkaja, saha ngerusak ring wewidangan Desa Sibangkaja pamargine patut kadi ring sor :
 - a. Mamaling utawi ngrusak ring genahe sinanggeh suci makadi ring pura, pamrajan, sane kamanggehang padruwen Desa lan sapanunggilan ipun, jadmapunika patut kadanda nikel ping 5 (lima) saking pangargan sane kapaling utawi karusak, taler kawewehin ngupacarain antuk caru lan pamrayascita genahe punika manut sastra agama hindu.
 - Na.Prade kantun metu wicara tan sida katepasin olih prajuru desa, patut kesukserahang ring sang ngawiwenang.

[Type text]

2. Yening wenten jadmamaling, ngrusak ring Desa Adat sibangkaja, prade ipun katara mamaling, ngrusak ring Desa Sibangkaja, jadmamaling kasukserahang ring sang ngawiwenang, makadi pemerintah lan salantur ipun.

Pawos 30

PAH _ PAHAN DADENDAN

Dadendan sane kapolihang patut kapah lima, sakadi ring sor :

- a. Sang nruwenang polih kalih (2) pahan
- na. Prajuru polih asiki
- ca. Desa utawi banjar polih kalih pahan

SARGA : IV
SUKERTHA TATA AGAMA
Palet : 1
Pawos : 31

DEWA YADNYA

Kahyangan utawi Pura-pura sane wenten ring wewidangan desa adat Sibangkaja.

1. Kahyangan utawi Pura - pura sane kasungkemin tur karemonin antuk krama Desa Adat Sibangkaja, makadi ring sor :
 - a. Pura Desa utawi Bale Agung
 - na. Pura Puseh
 - ca. Pura Dalem Gede
 - ra. Pura Prajapati Setra Anyar
 - ka. Pelinggih Padmasana ring kantor LPD Desa Adat Sibangkaja.
 - da. Pura Demung
 - ta. Pura Taman Beji
 - sa. Palinggih sane wenten ring lapangan Sibangkaja.
2. Pura Kahyangan Desa sane kasungkemin tur kaempon olih kalih Desa Adat (Desa Adat Sibangkaja lan Desa Adat Lambing Sibangkaja) makadi :
 - a. Pura Demung.
 - na. Pura Taman Beji.
 - ca. Palinggih Padmasana ring lapangan.
3. Kahyangan utawi pura-pura sane keangkenin sakewanten tan Kaempon antuk Desa Adat Sibangkaja, mekadi :
 - a. Pura Dalem Lebah, lan Prajapati Dalem Lebah.
 - na. Pura Manik Galih .
 - ca. Pura Ulun Suwi miwah Subak.
 - ra. Pelinggih Padmasana ring Kantor Perbekel.
4. Pura Swagina sane wenten ring wewidangan Desa Adat Sibangkaja sami keangkenin makadi : Pemaksan , Dadya, Paibon, Panti lan sapanunggilan ipun.
5. Pratima utawi pralingga manut pawos 31, wilangan 1 ,2,3,4 Patut lunga ka Bale Agung Desa Adat Sibangkaja rikala Sasih Kasanga, ri antukan pacang kawentenan pakiisan, sejabaning wenten paetangan sios.
6. Rikala Wenten Karya Agung, mekadi Ngusaba Desa, Ngusaba Nini, lan sapanunggilan ipun, Ida Bhatara Kahyangan Desa lan Dewa Nini sane wenten ring wewidangan Desa Adat Sibangkaja, patut lunga malinggih ring Bale Agung.
7. Indik rahina piodalan ring Kahyangan Desa Adat Sibangkaja kaunggahang ring Pawos 70 sajeroning piceket lan rerincikan ring unkur.
8. Upacara pengaci piodalan ring Kahyangan Desa Adat Sibangkaja, kamargiang 6 (nem) sasih pisan, pidabdab pemargine manut pararem.

9. Indik rerahinan jagat :
- a. Krama desane patut ngaturang pengaci lan pengrastiti ri kanjekan rerahinan jagat, makadi : Somaribek, Pagerwesi, Tumpek , Sugihan Jawa - Bali, Galungan, Kuningan, Budha Kliwon, Saraswati, Siwalatri miwah sapanunggilan ipun.
 - na. Pidabdab nyanggra pengaci rahinan jagat mekadi Galungan, Kuningan lan Buda Kliwon Pahang ,manut sastra kaungguhing ring piciket lan rincikan, sapunika taler indik Galungan Kala Rahu lan Nara Mangsa kasurat ring unkur (pawos 70)

Pawos 32 PEMANGKU

1. Suang - suang pura Kahyangan Desa Adat Sibangkaja, patut ngadegang Pemangku. Pemangku Kahyangan Desa sane sampun kemanggehang mekadi ring sor :
 - a. Pemangku Pura Desa
 - na. Pemangku Pura Puseh
 - ca. Pemangku Pura Dalem Gede
 - ra. Pemangku Pura Prajapati
 - ka. Pemangku Pura Taman Beji
 - da. Pemangku Pura Demung
2. Tatacara ngadegang pemangku kadi ring sor :
 - a. Kariinin antuk mastikayang indik ilikita (Administrasi) manut pararem.
 - na. Ngawilang saking turunan utawi wantah waris Mangku
 - ca. Papilihan krama desa ,parikrama manut pararem.
 - ra. Nunas pawuwus utawi nyanjaan
3. Tan wenang anggen pamangku luire :
 - a. Ceda angga saking wawu medal, peceng, perot, cungh, sengkok lan sapanunggilan ipun
 - na. Kageringan minakadi sakit ila, ayan-ayanan, buduh, beseh lan sane siosan
4. Prabea ngadegang pemangku kahyangan Desa Adat Sibangkaja,manut pararem.
5. Prabea ri kalaning pamangku kahyangan Desa Adat Sibangkaja kalayu sekar (seda) manut Pararem
6. Yening wenten kalayu sekar utawi seda ring paumahan (jeroan) pemangku Kahyangan Desa Adat Sibangkaja, wenang pemangku punika nyepuh, indik prabeanyane manut pararem.

Pawos 33
SWADHARMANING PEMANGKU

1. Swadharmaning Pemangku kadi ring sor :
 - a. Pemangku patut ngincepang sadaging sastra Kusuma Dewa pinaka gaguat rikala ngamargiang swadharma.
 - na. Nitenin wiadin nuntun kasucian Pura.
 - ca. Pemangku Kahyangan Desa tan kedadosang ngayah nikel (ngrangkep), bilih-bilih keadegang ring pura swagina lan sapanunggilan ipun.
 - ra. Pemangku rikalaning ngenterang upakara lan upacara ring Kahyangan miwah ring krama kadi ring sor :
 - Rawuh sakeng beji, Ida Bhatara ngadeg, majeng kapemedalan Pura kapendak antuk Dewa Galuh saha upakaranyane, raris maileh ka tengen (mider tengen) ping tiga (mapurwa daksina)
 - Rikalaning Ida Betara ngeranjing ke Pura, sadurung malinggih ring payogan Ida, patut Mapurwa daksina (mider tengen), (sakeng purwa utawi kangin mider ke daksina utawi ngelodang.
 - Ri kala Bhatara ngaluwur, taler mider, sakewanten mider kakiwa, tungkalikan mider tengen sane kabaos maprasawya.
 - ka. Pemangku Kahyangan kadadosang nganteb upakara lan upacara saageng-ageng upakarane punika wantah rawuh ring Padudusan Alit (mapulogembal), manut ring pawintenannyane, semaliha mangda katitenin olih prajuru lan angga kerta Desa, indik genahnyane nganteb miwah sane sios-siosan nganutin swadharma Eka Jati.
 - da. Yening wenten paetangan sios sajeroning pidabdab tata titining agama, Dane Pemangku patut masadok rihin ring Prajuru Desa mekadi angga kerta desa.
 - ta. Indik Piodalan ring Pura Kahyangan Desa nadi utawi jelih, nyatur tan nyatur kapuput antuk sang sulinggih,kautsahayang Ida Sang Sulinggih sane wenten ring wawengkon Desa Sibangkaja .
2. Panauran yan marupa jinah, taler yan marupa barang manut perarem.

Pawos 34
PIKOLIH UTAWI PITUAS PAMANGKU

1. Pamangku Kahyangan Desa Adat Sibangkaja, polih pituas manut perarem.
2. Indik sarin canang :
 - a. Ri kalaning Piodalan nyatur ring kahyangan Desa Adat Sibangkaja sesari punika manut perarem.
 - na. Rikalanin Karya Agung ring Khayangan Desa Adat Sibangkaja, sesari punika ka epah manut perarem.
 - Ca. Ri kalaning Penyepian, sesari punika kaepah manut perarem.
3. Pikolih utawi pituas pemangku, Bendesa, Angga Kerta Desa, manut perarem.
 - a. Pituas utawi pikolih pemangku manut kadi perarem .

Pawos 35
PEMANGKU KAGENTOSIN

1. Pamangku kagentosin sangkaning :
 - a. Kalayu sekar utawi seda
 - na. Pinunas ngraga, sakit-sakitan lan sapanunggilanipun.

2. Pemangku kagentosin sangkaning gumanti, mekadi :
 - a. Kauwusan manut paswrara santukan nilar sesana mekadi nyolong smara, mamotoh, memaling lan sapanunggilanipun.
 - na. Yan Dane Pemangku meraga purusa balu, kedadosang merabi malih, nanging tan ngambil rabi larangan, mangda ngambil rabi lasya. Yening mamurug patut kauwusan dados pemangku utawi kagentosin.
 - ca. Pamangku Kahyanagn Desa Adat Sibangkaja miwah pemangku siosan sane sampun kaadegang pemangku ring wewidangan Desa Sibangkaja, tan kapatutang ngelaksanayang ilen-ilen kalayu sekar (seda) mekadi paleletan (paringkesan) lan sapanunggilanipun.
 - ra. Pemangku taler tan kapatutang mejeng-ajengan ring genah sang kalayu sekar (seda) rikalaning madelokan, utawi ring setrane rikalaning ngeseng sawa.
 - ka. Prade wenten pamangku mamurug wilangan ca lan ra ring ajeng, mangda ngewaliang kasuciane manut sastra lan perarem.

Pawos 36
SUKERTANING KAHYANGAN

1. Sane tan kalugrayang ngeranjing sajeroning pura mekadi :
 - a. Sang sane kacuntakan .
 - na. Muat barang sane kasinanggeheh leteh
 - ca. Sato ageng manut sastra agama Hindu, sajawaning pacang kaanggen mayadnya.
 - ra. Wong dura desa yan tan polih panugrahan saking prajuru desa.
 - ka. Prade wenten sang sane katapak, karauhan, kasurupan, patut kapintonin, makadi siram antuk toya, yan ipun belus tan sandang geganin. Patut ngaturan gurupiduka lan prayascita manut sastra agama Hindu.
 - da. Pragina tan kadadosan mapayas ring pura, sajawaning wali.
 - ta. Sajawaning Pamangku sane ngamong, sapisira ugi tan kadadosang munggah ring bebataran palinggih, yan tan polih panugrahan sakeng prajuru desa.
 - sa. Yan wenten mamurug kadi ring ajeng, patut kadanda, manut pararem.

2. Kahyangan kahanan Kadurmenggala makadi :
 - a. Kasamber kilap, katibeng angin.
 - na. Puwun utawi katunuan.
 - ca. Karubuhan taru ageng.
 - re. Kahanan lulut
 - ka. Karanjingan pandang utawi maling

- da. Karanjingan wong edan (buduh)
 - ta. Karanjingan sato ageng
 - sa. Kasiratan rah manusa sangkaning gumanti
 - wa. Masanggama ring pura
 - la. Anak alit sampun maketus, mabacin, mewaroh ring pura
 - ma. Palinggih lan wangunan kaumahin tabuan kulit
 - ga. lan sapanunggilan ipun manut sastra agama.
3. Kahyangan kabawos cemer mekadi :
- a. Masalin wastra ring pura, sajabaning Pamuput (Sulinggih) lan wali.
 - na. Masusun rare ring pura
 - ca. Marebat, mamisuh, wak parusya ,ngamedalang baos cemer ring anak sios sangkaning gumanti drenggi manahnyane ring pura.
 - ra. Sang sane sampun munggah Daa-Truna,maseneng-senengan tur sirep – sirepan lanang wadon dados asiki.
 - ka. Sang sapisira ugi sane melaksana kadi ring ajeng, yen saking pakardin manusa bilih-bilih krama saking Desa Adat Sibangkaja, sang melaksana punika patut kadanda manut pararem.
- da. Yening Wong dura desa utawi sios agama mamurug kadi ring ajeng, patut kasukserahang ring sang ngawiwenang.

Pawos 37

CUNTAKA UTAWI SEBEL

1. Cuntaka utawi sebel wenten kalih wilangan kadi ring sor :
- a. Cuntaka sakeng pedewekan mekadi :
 - Ngeraja Swala
 - Nganten dereng masakapan (mekalan-kalan),.
 - Rare sedereng macolongan.
 - Anaking istri lanji, durung meprayascita, tur dereng maperas
 - na. Cuntaka sakeng pedewekan pangambilan ipun kadi puniki :
 - Sebel sakeng ngeraja Swala suen ipun tigang rahina.
 - Sebel madrue putra (sebel kandelan) suen ipun 42 rahina
 - Sebel nganten suen ipun selami ipun dereng masakapan
 - Anaking istri lanji suen ipun, salawase durung wenten sane makusara utawi durung kaperas tur durung mabyakala.
2. Cuntaka sakeng kalayu sekar (seda) pangambilane kadi ring sor :
- a. Cuntaka pakraman inggih punika cuntaka sane wenten pakilitania ring sameton banjar, pangambil sebelania ngawit sakeng makarya, nyantos maprayascita.
 - na. Cuntaka keluarga, inggih punika cuntaka sane kaambil antuk sang sane wenten paiketan keluarga ring sang ical, sakewanten, nenten wenten malih mapaiketan ring cuntaka pakraman ring ajeng.

- ca. Cuntaka sang sane nruwenang sawa, pangkedan ipun kadi ring sor :
 - yan ngarepin kantung sajeroning paumahan suen ipun 12 rahina ngawit sakeng pengutangane, maweweh malih selami sawane ring paumahan sang nruwenang. (Lontar Brahmantia Purana).
- ra. Cuntaka atiwa-tiwa tan ngangge sawa, makadi : Ngasti wedana, swasta, lan sapanunggilan ipun, pangambilan cuntakan ipun : Ngawit sakeng ngangkid kantos upakara mapegat (meprayascita)
- ka. Cuntaka atiwa-atiwa sane wenten paiketan ipun ring tumandang mantri :
 - Sane kawastanin tumandang mantri inggih punika yening ring rahina kapatian sang mati, ngelantur kalaksanayang upacara pengabenan, raris kalanturan upacara nyekah, ring rahina punika sapisan.
 - Sane kawastanin ngaben nglanus inggih punika, pantaraning pemargin upacara pengabenan ring upacara nyekah tan wenten selat (batas), lan ring rahina sane nenten malih ngetang/keni kecuntakan.
 Sahananing kacuntakan ring ajeng, sampun prasida ical (kasuciang) sesampune kalaksanayang upacara pangelemijian.
3. Sane tan keni cuntaka mekadi :
- a. Sang sane sampun maraga putus, pandita, pamangku, tukang banten, tukang upakara, prajuru banjar, lan prajuru Desa lanang lan istri
- na. Tatundenan, tukang upakara, sane kariinin antuk maprayascita.
- ca. Rikalaning dewa yadnya sampun nanjeb surya, mapangalang sasih.

Palet 2

Pawos 38 INDIK RESI YADNYA

1. Sang Pacang mapudgala (ma-dwi Jati), sajeroning nunas panugran ring sang ngawiwenang (Parisada Hindu Darma), taler patut masadok ring Bendesa Adat lan Kelian Banjar Adat.
2. Prajuru inucap patut nitenin, nureksa manut kecaping agama Hindu, mekadi cedangga, malaksana Sad Atatayi, Asta Dusta lan sapanunggilanipun.
3. Sapupute mapudgala (ma-dwijati) prajuru patut nyobyahang utawi ngelimbakang biseka kawikonanya manut panugrahan nabanya ring banjar utawi ring desanya.
4. Krama Desa Adat Sibangkaja ngemargiang Resi Yadnya mejalaran antuk ngaturang punia ring Sang Sulinggih suwang –suwang geria sawewengkon desa adat Sibangkaja marupa jinah manut pararem.

Pawos 39

Pamargin Sang Sulinggih patut :

- a. Rikalaning Krama Desa Adat Sibangkaja ngwangun yadnya, prade sampun sumanggem ring sang Pamuput utawi sulinggih, Ida Sang Sulinggih sane katuwur mangda mikayunin yadnyan kramane , tur nginggilang pinunas kramane sajeroning pamuput
- na. Krama Desa sami patut nitenin, katuntun antuk dulu-dulu utawi Prajuru desa, mangda Yadnya sane kemargiang kapuput olih Sang Sulinggih manut pamutus prajuru desa.

Palet 3

Pawos 40

INDIK PITRA YADNYA

Pidabdab Pitra Yadnya dudonan ipun kadi puniki :

1. Makingsan ring ibu pertiwi utawi ring geni, selami nuptupang prabea, makacihna patut ngaturang pejati, ring Sanghyang Prajapati, sedan setra, sedan bangbang, tan ngetang padewasan, pamargine surup surya.
2. Atiwa-tiwa wiadin ngaben; jadma sane wenang abenang wantah jadma sane sampun maketus untu (Ma kupak).
3. Ngelungah : sang sane patut Ngelungah inggih punika; rare padem (seda) sane mayusa 3 sasih sadereng maketus . Sajawaning wenten paetangan sios.
4. Anak alit (rare) padem (seda) sadereng mayusa 3 sasih, tan kapatutan ngelungah patut pendem. Sajawaning wenten paetangan sios.
5. Yan wenten Anak alit (rare) padem sadurung kepus puser (pungsed) patut kalaksanayang upacara ngelangkir , dudonan ipun kadi ring sor :
 - a. Tirta panglukatan
 - na. Pangendag bambang
 - ca. Mapakeling ring Prajapati, sedan setra lan sedan bangbang
 - ra. Ayaban sawa, manut dresta lan sastra agama hindu.
6. Yan wenten anak istri bobotannyane mayusa asasih ngantos tigang (3) sasih raris karuron patut ngelaksanayang upakara pecaruan, sane kabaos caru warak karuron ring natah umahnyane. Yan karuron sadurung asasih sampun embas, kabaos cuntaka ring raga.
7. Yan sangkaning gumanti bobotane kaembasang kebawos brunaha (himsakarma) upakaran ipun taler macaru warak karuron ring umahnyane.
8. Yan wenten krama katiben sungkan rahat, mewastu ngemasin magetep silih sinunggil anggannyane (Amputasi), anggane sane kagetep punika wenang bakta kasetra saha upakara kadi ring sor :

- a. Pejati 2 (kalih) soroh katur ring Prajapati asoroh lan ring sedahan setra asoroh.
 - na. Soda putih kuning asoroh
 - ca. Parikramane patut mageseng, sapupute dados abu raris ranjingang ring klungah gading lantur keanyut maduluran daksina pejati maka sarana matur uning ring betari gangga.
9. Desa adat Sibangkaja ngelaksanayang upacara Pitra Yadnya nyekah massal lan Manusa yadnya manut paswara lan pararem.

Pawos 41

Kasukertan Rikala Kahanan Seda (padem)

Swadharmaning sang kahanan kalayu sekar :

1. Sang madruwe kaduhkitan kalayu sekar patut masadok ring prajuru banjar ngelantur ring Bendesa Adat Sibangkaja, nganinin indik rahina padewasan lan epahan setra sane kapatutang, taler indik pamargine, mapendem utawi mageseng.
2. Swadarmaning banjar: prajuru banjar patut nyuwarayang kulkul manut pawos 16.3.7, makacihna warga banjar katiben kalayu sekar.
3. Panyanggran banjar kadi puniki :
 - a. Suang-suang krama nedunin, tur ngamedalang patus manut pararem, sapunika taler prade kaabenang.
 - na. Krama banjar sane lanang makarya : pangusungan, dusa, ante, dados kawewehin peti, miwah siosan, manut dresta ring Desa Adat Sibangkaja
 - ca. Krama banjar sane istri makarya : eteh-ete sopakaraning pangringkesan, sane kabaos pengabenan ngerti ring desa Adat Sibangkaja.
 - ra. Busana krama lanang-istri mangda mabusana adat madya.
 - ka. Pamargin krama banjar ri kala ngusung sawa ka setrane mangda dabdab, tur mangda antar, samaliha tan kapatutan nguyak-ayik sawa, bilih –bilih sawane kantos ulung, patut nebusin lan mrayascita ring genah sawane ulung, prabeyanipun katatak olih banjar inucap.
 - da. Yan wenten wicara kadi inucap ring ajeng, pamekas nomer ka, mangda katitenin utawi kapakelingin oleh prajuru banjar inucap.
 - ta. Yan wenten sane mamurug paos ring ajeng pamekas (na lan ca), prade tan jangkep kaangge pakaryan banjare rikalaning ngaben, sang sane mamurug :
 - tan polih pakaryan Ida dane banjar
 - tan kalugrayang nganggen padruwen desa.

Indik Nglangkar Watang.

- a. Sane kawastanin nglangkar watang, yening kramane ngutang sawa ka setrane ngamarginin diwangan sang kalayu sekar sane dereng makutang.
- na. Ri kala makutang ngamarginin margine asiki dina tunggal patut sane nampekang setra mamargi riinan, tan kadadosan sane dohan nglintangin sane nampekang setra.

- ca. Rikala sampun panumaya pakutangan, prade wenten malih jadma padem, nampekang setra margine tunggal, tur durung presida mamargi, mangda antar pamargine, Prajuru Desa lan Prajuru Banjar inucap patut ngutsahayang nyelang setra siosan ring wewidangan Desa Adat Sibangkaja, maka sarana upakara penanjung batu lan Daksina Pejati, manut ring setra sane kacumpuang, tur prabeyanipun katatak olih Banjar.
- ra. Pamargin sawa ke setrane nganutin kawigunan margi, manut dresta desa Sibangkaja.
- ka. **Pakeling** : Prade tan ngamolihang margi lan setra siosan tur mangda sida memargi padewasane patut kemargiang pamlehpeh lan panyengker ngelangkar watang manut kecap sastra.....kadi puniki : sang sane madruwe watang jagi ngelangkar, patut matur piuning ring pura dalem, ring pengulun setra, lan ring Prajapati, mapiranti antuk upakara peras daksina, tipat kelanan, sepisan nunas pengruat jalan ring dalem. Tur Sang Sane nuwenan layon sane kelangkungin nunas tirta penyengker paturon/paumahan ring Pura Dalem mapiranti antuk upakara Daksina gede asiki, benang tri datu selawas nyengker paumahan, segehan limang tanding warnannya manca desa, kaadegan ring tengahin natah. Sampun puput pekutangan, benjangne penyengker punika patut ke lebarang majalarang antuk segehan agung
Patut katitenin olih Bendesa adat utawi prajuru banjarmangda ilen-ilen penyengker kamargiang dumun, wawu raris mamargi ke setra.
- da. Yan wenten sane mamurug kadi ring ajeng, patut kadanda manut pararem.

Pamargin Rahina pengabenan Utawi pelebon :

- a. Mangda anut ring padewasan
- na. Manut lontar Padma Usadi tan kadadosang kadi :
 - Rahina soma Kliwon, Saniscara Kliwon, Anggara Keliwon, Buda Wage, Purnama-Tilem, Prawani, Dora, Semut Sedulur, Kala Gotongan, Nyandung, Makirim Wangke, ngutang tiga sapisan setra tunggal, rerainan jagat, rikala Bhatara Kantun nyejer, was anten.

Indik was nganten :

a. Rikala nemonin rahina redite nuju was nganten tan kadadosan atiwa-tiwa, nanging yan rahina risejeroning awuku punika wenten padewasan dados kamargiang atiwa, umpami Buda pon tolu, kadadosang (rahajeng temen atmania mangguh siwa pada)

na. Was nganten sane dados atiwa-tiwa : inggih punika redite wage krulut, redite pon dukut, (Swarga menga)

- ca. Ri kala ngaben dadakan sane sengkeripun awuku, ngawit kalayuan, mangda kakelidin dewasa mekadi : pasah, reraianan, tanggal panglong ping 14 lan 15, kala gotongan, semut sedulur lan piodalan ring pura khayangan Desa Adat Sibangkaja

4. Sawa sane tan dados kainejang :

- a. Yan wenten sawa ngadut beling, usahayang mangda bobotane sida embas, menawi antuk maprasi, miwah pidabdab sane siosan. Risampune embas,

pidabdab selanturipun : memenyane, dados kaabenang kadi biasa, sakewanten pianaknyane katanem, manut kecap sastra agama Hindu.

- na. Ri kalaning jagate kageringan
- ca. Anak alit durung maketus

5. Penanjung Batu

- a. Setra sane kasungkemin antuk Desa Adat Sibangkaja wantah setra sang sane maagama Hindu.
- na. Yan wenten Wong dura desa sane maagama Hindu, ngeseng utawi nanem sawa ring setra Desa Adat Sibangkaja, keni pananjung batu manut pararem.
- ca. Yan wenten Wong dura desa sios agama padem (seda) ring Desa Adat Sibangkaja, tan kadadosang ngangge setra druen Desa Adat Sibangkaja.
- ra. Pebasnian (Tunon) majeng ring Sang Sulinggih :
Pabasmian utawi tunon Ida Sang Sulinggih katur genah ring pemanggahan setra, genahnyane nyeje ring pamuwunan sane sampun wenten, maduluran upakara pamarisuda agung manut sastra agama hindu.
Pemanggahan setra inggih punika : wewidangan pemajogan setra.
Sapuput palebon genah punika kal lebar masarana upakara tur kawalian kawigunanyane kadi jati mula.

6. Tata sukertaning ring Setra

- a. Tan Kadadosang makta tanah setra ke Desa Adat yan ten wenten pikenohipun.
- na. Tan dados makarya kuburan permanen
- ca. Tan dados nginepang bambang
- ra. Tan dados ngeludin sawa utawi nyacah sawa, lan sapanunggalan ipun ring setra, ila-ila dahat.
- ka. Yen wenten mamurug kadi ring ajeng, keni danda manut pararem.

Pawos 42

NGULAH PATI SALAH PATI

Mati ngulah pati salah pati mangda upakara lan upacaraipun sakadi mati/seda biasa, maweweh nebusin ring genahe seda.

Pawos 43

PANGABENAN UTAWI ATIWA-TIWA

1. Bebacakan pangabenan atiwa-tiwa wenten tigang (3) soroh :

- a. Sawa preteka tegesipun mreteka sawa utawi taulan, pangabenan madia, papempenan genep
- na. Sawa Wedana teges ipun sawa karesian, sawa ngangge awak-awakan cendana, majagau, payuk, makadi suasta pranawa lan sapanunggilanipun. Sawa Wedana puniki marupa pangabenan agung, mabuku-buku sanistane 50 kepeng jinah bolong.

- ca. Kerti Parwa utwi sawa prakerti mateges, pangabenan sane nganggen kwangen 3 **utawi** 7 , saji asele.
- 2. Upacara pangabenan ngawangun wenten kalih soroh kadi ring sor :
 - a. Sawa Preteka
 - Na. Sawa Wedana
- 3. Upacara pangabenan prenawa kadi ring sor :
 - a Sawa Prenawa
 - na Toya Prenawa
 - ca Kusa Pranawa
 - ra Supta Pranawa
 - ka Geni Prenawa
- 4. Upacara pangabenan nywasta wenten kalih soroh kadi ring sor :
 - a. Swasta Geni
 - na. Swasta Bangbang
- 5. Upacara pangabenan Kerti Parwa :
 - a. Upacara pangabenan nglanus, wenten kalih soroh :
 - Nglanus tandang mantri
 - Nglanus tumandang mantri
 - na. Upacara pangabenan ngerit
 - ca. Upacara pangabenan nglungah

Pawos 44

EEDAN PAMARGIN PANGABENAN

1. Ngaben Alit kerti Parwa sane ketah ngangge saji asele, kapuput antuk sang Sulinggih, taler dados kemargiang olih sang Welaka yan sampun polih panugrahan sang Sulinggih.pamargine puput ring setrane, upakaranipun nganutin kacaping Yama Purana Tattwa, suwenipun masengker 7 rahina sakeng dinane kalayuan.
2. Ngaben Madia, Suwenipun masengker 3 wuku, sakeng dinane lampus, Kapuput antuk Sang Sulinggih saha bale pawedan.
3. Ngaben agung dados nyekeh layon selami 6 sasih, manut ring dewasa lan sapanunggilanipun.
4. Dudonan pamargin atiwa-tiwa nista utawi alit jantos puput ring setra, patut taler kaanutang ring keputusan pamerintah makadi sane munggah ring buku Kumpulan Keputusan parisada Hindu Dharma Propinsi Bali sane sampun kawedar.
5. Dharmaning krama banjar ri kalaning nitenin pangabenan inucap ring ajeng, nganutin sajeroning pararem Banjar Adat suang-suang.

Palet 4
Pawos 45
INDIK MANUSA YADNYA

1. Manusa Yadnya inggih punika :
Upakara lan upacara dharmaning manusa ngawit saking patemonin kama petak lan kama bang sajroning garbha jantos kalayu sekar ri wekas.
2. Upakara lan upacaranipun madudonan kadi ring sor :
 - a. Magedong-gedongan
na madapetan, duk sang kama reka wawu embas
 - ca. Kepus udel
 - ra. Nglepas aon ri sasampune mayusa 12 rahina
 - ka. Macolongan/akumbuan mayusa 42 rahina
 - da. Masambutan utawi tigang sasih
 - ta. Aoton utawi maoton mayusa 6 sasih
 - sa. Ngempugin ri sampun tumbuh untu
 - wa. Mungah Daa-Truna lan metatah.
ma Mawiwaha utawi madengen-dengenan.
 - ga. Mawinten lan sapanunggilanipun.
Upakara lan upacara inucap, nista madya, utama, manut ring kawentenan sang mayadnya, manut dresta lan sastra agama Hindu.

Palet 5
Pawos 46
INDIK BHUTA YADNYA

1. Bhuta Yadnya inggih punika upakara lan upacara yadnya katur ring sang bhuta Kala
2. Bhuta yadnya punika ketah kabaos macaru.
3. Pacaruan inucap, nista, madya, utama manut kawigunan makadi ring sor :
 - a. masaiban, yadnya sesa.
 - na. Masegehan
 - ca. Ekasata
 - ra. Pancasata
 - ka. Mancakelud
 - da. Mancasanak
 - ta. Rsigana
 - sa. Tawur Kasanga miwah sapanunggilanipun
 - wa. Sasih, kemargiang ngawit sasih ka 5(lima) ngantos sasih ka 8(kawulu), krama desa patut ngaturang prani ring kahyangan tiga manut pah-pahan banjar suwang-suwang, naler nyantos dedauhan sakeng guru wisese mekadi PHDI.
 - la. Carun linuh. kamargiang ring desa lan suwang-suwang paumahan nganutin sasih katiben linuh manut sastra agama hindu, katitenin olih Bendesa Adat.

Pawos 47
TAWUR KASANGA

1. Rikalaning nyanggra Tawur Kasanga tan dados utawi tan kapatutang nywarayang suara awor sadurung pangrupukan mekadi : makeplug-keplugan, mercon miwah sapanunggilanipun.
2. Ring rahina pangrupukan, Pamangku Kahyangan lan Prajuru Desa, mangda maileh katanggungan-tanggungan desa makta sundih utawi obor, kulkul, nyembarang meswi (nyimbuhan meswi)
3. Tawur kasanga wenten pakilitannyane ring panyepian, dudonyanne kadi ring sor :
 - a. Yan tan wenten paetangan sios, 3 rahina sadurung Nyepi, patut Mekiis, Arca, Pratima lan Pralingga Ida Bhatara kasuciang ka Segara utawi ring Pabejian Bhatara, wus punika Ida Bhatara nyejer ring Bale Agung.
 - na. Benjangne Ida Bhatara Kantun Nyejer ring Bale Agung, Kramane mangda ngaturang sodan sakasidan
 - ca. Ring Tileming Sasih ka Sanga kawentenang pacaruan ring Pempatan Agung, suang-suang banjar miwah pumahan manut sastra agama Hindu.
 - ra. Yening Tileming Kesanga kanjekan wuku Dungulan, sabanen pegat tuakan (Budha Kliwon pahang), nenten ngaturang Taur Kesanga, sakawenten nutug melis ring Tilem Kadasa. Mapaiketan ring indik inucap patut nyantos paswara lan ilikita saking guru wisesa mekadi PHDI.
4. Ring tanggal pisan sasih ka Dasa kawastanin Nyepi, parikramane nganutin catur panyepian mekadi :
 - a. Amati Geni, tan kengin maapi-api, sajabanin matepetin rare, dereng 3 sasih, wantah ring genah rarene kewanen. asapunika taler ring sang matepetin anak sungkan miwah seda.
 - na. Amati karya : Tan kadadosang makarya, sakalwir utawi sekancan pekaryan ring rahina punika.
 - ca. Amati Lampah : tan dados malelungan sawawaning makta ilikita (surat jalan) sang ngawiwenang.
 - Tan dados mamargi miwah mecanda ring margi ageng sekantune rahina, indike punika mangda katitenin olih pacalang lan Prajuru Desa.
 - ra. Amati Lelungan : tan dados ngawentenang tontonan, tetabuhan, jejudian miwah sane siosan. Indike punika mangda katitenin olih Prajuru Desa lan Pecalang.
5. Risampun puput ngemargiang Catur Brata Penyepian, benjang semengane kabawos ngembak geni, kramane sampun dados ngawitin mekarya sekadi sane sampun -sampun, sakewanten nyatos suaran gendongan (kulkul) Desa, maka cihna nglebar Catur Brata Penyepian.

Sarga V
SUKERTA TATA PAWONGAN
Palet 1
Pawos 48
INDIK PAWIWAHAN

1. Pawiwahan inggih punika patemoning Purusa lawan Pradana, sekalan ipun panunggilan saking kayun suka cita (Manawa Dharma Sastra) saha widhi widana manut sastra Agama Hindu (Manusa Prakerti).
2. Pemargin Pawiwahan kadi punika :
 - a. Papadikan kariinin antuk :
 - sampun pada arsa
 - kariinin antuk pasedek saking kulawarga
 - kelanturang medarma suaka
 - wawu raris pakrunan
 - na. Ngrorod wiadin merangkat pengambile riinan, wawu kaetut antuk pakrunan.
 - ca. Nyeburin utawi Nyentana sekalan ipun mangda kariinin antuk kasumanggeman kulawarga Daa lan Truna.
 - Pidabdab kadi punika mangda kesaksinin olih prajuru Adat lan Dinas
 - Wus punika, raris kalanturang antuk upakara lan upacara manut sastra Agama Hindu
3. Pidabdab sang pacang marabian patut :
 - a. Nganutin yusa makadi sampun munggah Daa-Truna, munggwing sane lanang sampun mayusa 25 warsa, tur sane wadon mayusa 20 warsa, sejawaning wenten paetangan sios.
 - na. Sangkaning sami pada arsa.
 - ca. Prade pengambile sios Agama, patut keriyinin antuk upacara Sudi Wadani sane kesaksinin olih Prajuru Desa kadulurin antuk sewala patra sane kelingga tanganin antuk sang muatang saha ketumusang ring Parisada Hindu Dharma Indonesia maka cihna sang sane sios ring agama Hindu punika sampun prasida ngeranjing ma-agama Hindu.

Siosan ring upacara manut wilangan ca ring ajeng, sang mawiwaha sios agama punika patut ngelaksanayang upacara manusa yajna metatah utawi mepandes, taler tan ngirangin yan wenten pekayun ngemargiang upacara lan upakara anut rare nganutin sastra Agama Hindu.

4. Pidabdab pawiwahan inucap mangda nganutin UU Nomor 1/1974 (tentang Perkawinan), PP.Nomor 9/1975 lan paswara Gubernur Kepala Daerah Tingkat I Bali
5. Pawiwahan sinanggeh pastika makacihna wenten :
 - a. Dewa saksi, makadi Widhi Widana katur ring Ida Sang Hyang Widhi kapuput olih Sang Sulinggih utawi Jero Mangku manut ring agung alit upakaranyane.
 - na. Bhuta Saksi, makadi mekalan-kalan, lantur madengen-dengenan kemargiang olih Mangku sonteng utawi sang Serati sane ka sudi olih sang druweya karya. Mungging genah pakalan-kalane ring natar paumahan.
 - ca. Manusa Saksi, makadi saksi kulawarga, pamekas manggala lan prajuru Desa Adat saha Banjar Adat, manut desa, kala, patra taler nganutin uger – uger paswara Guru Wisesa.
 - ra. Yening wenten krama Desa Adat Sibangkaja ngelaksanayang pawiwahan ring sios Desa Adat Sibangkaja, bilih-bilih sane sampun madruwe rabi sane tan kesaksinin olih prajuru, kesinanggeh sah yan ring sajeroning kulawargannyane nenten wenten wicara sane ngewetuang biuta sesampune punika mangda kawentenang pesadok ring sang ngawiwenang utawi ring prajuru banjar genahnyane jumenek.
 - ka. Yan prade wenten krama sios desa, sane magama Hindu dereng ngeranjing dados krama dinas lan Adat kedadosang ngemargiang pawiwahan ring wewidangan desa adat Sibangkaja. Sake maon keriyinan masadok ring prajuru banjar lan prajuru Desa. Kasaksiang antuk prajurunyane, . keni penanjung batu manut perarem.
 - da. Yan wenten krama tiosan ring agama Hindu ngewentenan upacara wiwaha ring wewidangan desa Adat sibangkaja, kedadosang, sakewanten mesadok ring prajuru Banjar lan prajuru Desa, keni penanjung batu manut paraem.

Pawos 49

PANGAMBILAN MIWAH SANGGAMA TAN PATUT

1. Pangambilan lan pasanggaman tan kapatutang ring Desa Adat Sibangkaja makadi :
 - a. Ngambil saking paradara budi utawi pepaksan.
 - na. Gamia gamana, marabi utawi masanggama sareng semeton sodet, semeton kualon, ring aji utawi biang, pekak utawi dadong, garis kenceng.
 - ca. Salah timpal,(masanggama sareng sato utawi buron).
 - ra. Badawasa, masanggama sareng sesaman, muani sareng muani, luh peturu luh.
 - ka. Ngambil rabi utawi pawiwahan langkungan ring adiri dina tunggal
 - da. Mamitra inggih punika, patemon utawi sanggama sekadi alaki rabi, sakewanten nenten maupakara manut upacara pawiwahan sane kebaos kumpul kebo.
 - Yening wenten purun mamurug no. a kantos da ring ajeng tur ngewetuang wicara patut ketitenin antuk prajuru bilih-bilih wenten pasadok, prajuru patut nitenin tur niwakang pamutus.

Yening piwal ring pamutus prajuru, jadma ika patut kadanda manut pararem .
 - Ta. Yening wenten jadma sane alaki rabi, silih tunggil melaksana nyolong smara, patut jadma ika katiwakin danda manut perarem:
2. Anaking Stri Lanji (Panak Bebinjat)
 - a. Yen wenten jadma mobot (beling) nenten wenten anak ngangkenin bobotan punika, asapunika taler bobotane punika nenten ma-Widhi-Widana, utawi mawiwaha, raris embas bobotane, punika kawastanin anak Stri Lanji (Panak Bebinjat).
 - na. Prade wenten kadi ring ajeng, kulawargan sang mobot punika patut mataken riin, ring sang mobot, sapisira lanangnia sane makarya bobotane punika?.
 - ca. Ri wus janten kauningin sang ngawinang bobotane punika, kulawarga sang mobot ngawentenang rerembungan, mangda tuwon ring pakardinia saha mangda kaambil kaanggen rabi nganutin tata krama.

- ra. Sajroning rerembungan tan prasida puput, kulawarga sang mobot ngawentenang pasadok ring prajuru desa saking dasar riin, raris ngunggah-ngunggahang rauh ring sang rumawos jantos puput.
- ka. Prade tan nganutin pawos ring ajeng, sang makarya bobotan punika kadanda manut pararem.
- da. Sadurung wilangan a kantos ka ring ajeng kamargiang, sang melaksana punika tan kadadosang ngranjing ka genah sane sinanggeh suci ring Desa Adat Sibangkaja

Pawos 50

TATA CARANING PARABIAN

1. Yan papinangan utawi memadik pangambile dudonanipun sakadi ring sor :
 - a. Yan mamadik, sang daa kaarsayang antuk kulawargan sang truna
 - na. Sesampune sami adung tur puput bebawosan patut sang daa kawehin pengiket, marupa base lekesan miwah, sane siosan (mangda prasida kemargiang).
 - ca. Babaktan rikala mamadik, maka cihna pakrunan marupa canang pangrawos, artha brana, miwah sane siosan manut dresta.
 - ra. Ring rahina pangambilan irika sang daa patut mapamit, ring Pamrajan-sanggah, ring yayah Rna miwah sane siosan maduluran antuk Daksina Pajati, lan kelanturan antuk timbang trima olih Prajuru Adat lan Dines.

Nganinin pidabdab ring ajeng ,kelanturang antuk nuku suwaran kulkul saking kulawarga sang lanang, dwaning silih sinunggil kulawarga sang wadon kaambil. Panukun swaran kulkul manut perarem
 - ka. Ring rahina pawiwahan, sapupute makalan-kalan buncinge mawali budal ngaturang jauman (tipat bantal) sakemaon yen prade dina punika tan prasida ngelanturang mejauman, kapatutang ring galah siosan
2. Ngrorod
 - a. Ngrorod utawi ngelayat pangambile, sang Daa kaengkebang (reramania kamalingan), sang Daa gumanti lumaku (ngangkenin), sang Daa kagenahang ring siosan desa, raris kaetut kadi pamargi sapuniki : lumaku, makruna, ngluku.
 - na. Pamargin lumaku sakirang-kirangipun 3 rahina, kulawarga sang truna ngrawuhin genah wit sang Daa gumanti lumaku (ngangkenin) ngambil sang

Daa, rikalaning lumaku kadi ringajeng, patut masadok ring genah sang Daa kaengkebang, madulurang rerepi lingga tangan sang kalih sane sampun pada cumpu.

- ca. Babaktan sang ngluku macihna antuk suar (lampu)
- ra. Pamargin makruna kalih ngluku, dinane kapastiang ring sang nruenang Daa.
- ka. Sang nruwenang Daa tan cumpu wenang ngawentenang panureksan tur kesaksinin ring prajuru Adat lan Dines.
- da. Yan macihna pengambile pepaksan utawi tan pada lila, wenang kapalasang tur kalanturang ring sang rumaos makadi sang ngawiwenang.
- ta. Ring sajeroning pemargin perabian mangda sang madue Daa nyuarang gendongan (kukul) makacihna wenten krama Daane keambil majalaran antuk pamuput bebaosan sane antar
- sa. Ring dina pawiwahan pamargine pateh ring paos 50.3.

Piteket :

Pabinayan papinangan ring ngelayat

- Pepinangan pengambile mejalaran antuk papadikan, majauman rikalaning puput ma kalan-kalan utawi risampune puput widhi wedana pawiwahan.
- Ngelayat pidabdabnyane : kulawarga sang Daa kemalingan Daa, saha sang Daa kaengkebang ring sios desa salami ngawilangin padewasan lan nuptupang prabeya ngelanturang pawiwahan. Nganinin indik majauman ring galah pawiwahan, yening tan kengin ka genah wit daa, kangkat saking genah pawiwahan sane kawastanin ngelumbung.
- Asu mundung lan anglangkahi karang ulu tan kebawosang iriki, yening wenten paetangan tios, tan pacang ngirangin yen prade sang muatan ngemargiang mapatiwangi (*Catur Yuga*)

3. Tata caraning parabian nyeburin

Yan nyeburin pamargine kadi puniki :

- a. Ri kala ngluku patut bebawosane adung saking kulawargan sang Daa wiadin sang Truna.

- na. Genah pawiwahane patut ring genah sang Daa Pinaka Purusa, tur kasaksiang antuk prajuru miwah kasiarang ring krama banjar taler kaungghang ring sajroning ilikita.
- ca. Makta jauman ring genah (umah) sang truna pinaka pradana.

Palet 2
Pawos 51
INDIK BALU LAN NYAPIHAN

1. Marabian prasida pasah majalaran antuk :
 - a. Silih tunggil lampus sane kabaos balu
 - na. Sangkaning pada lila, utawi mawiwit wicara, kabaos nyapihan.
2. Sang ayat palas marabian patut atur supeksa ring sang rumawos minakadi Pengadilan Negeri, wastu tuntas galang apadang tur kasiarang ring banjar antuk prajuru Banjar Adat.

Pawos 52
TATA CARANING PALAS MARABI

1. Sulur palase prade sinalih tunggil anyasar laku, matilar tan pasadok jantos 6 sasih, wak parusia asta capala tan prasida adung malih :
 - Yen prade wenten pemargi sekadi puniki patut ketegepin antuk mapamit ring Ida Batara Hyang guru ring Sanggah/merajan, tur kesaksinin olih prajuru Adat lan Dines mastikayang jadma inucap tan sida adung malih.
2. Yening wicarane katumusang antuk lanange patut macihna sane istri :
 - a. Paradara budi utawi nyolong semara
 - na. Mambul-ambulan jantos 42 rahina, langkungan ring 42 rahina, prajuru banjar patut nitenin, nureksa mastikayang parindikane punika, yan jantos langkung ring 6 sasih pastika sampun palas.+
3. Yening wicarane katumusang antuk wadon macihna :

- a. Dratikrama
 - na. Wandu
 - ca. Tan nyanggamin
 - ra. Tan prasida ngwehin pangupajiwa
4. Prade wicarane ringajeng sampun wenten saksi, bukti, ilikita, parabiane kengin kapalasang yan sampun sang kalih sami cumpu.
 5. Yan wenten palas marabian, malarapan pada lila, katepas antuk sang rumawos, wenang sang palas punika masamsam beras kuning ngelung jinah bolong ring Bale Agung, kasaksinin antuk prajuru banjar lan prajuru desa, prasida ipun mawali dados sakadi Daa-Truna.

Pawos 53

KEBO NGULIHIN KANDANG

1. Yen wenten silih sinunggil krama palas marabian saha sampun wenten ilikita mawali malih ring umah ipun, patut keni danda manut perarem
2. Yan wenten san alaki rabi jantos mambul-ambulan mawiwit sangkaning biuta sajeroning marabi, mawali ka umahnyane suwenia 6 sasih, mangda sang sane nampi ngawentenang atur supeksa ring prajuru banjar adat. Kelian banjar adat patut nitenin sapariindikannyane ring sajeroning wicara marabian, tur ngelantuang ring sang ngawiwenang yening tan prasida adung malih.
3. Yan wenten krama pastika palas marabi, tur malih adung parabiane, punika patut ngawitin malih nglaksanayang Widi-widana pawiwahan.
4. Yan wenten mamurug (kadi nomor 3) ring ajeng, patut kadanda manut perarem.

Pawos 54

INDIK BALU

1. Balu manut kawongania kabinayang dados :
 - a. Balu wit saking sentana rajeg
 - na. Balu wit mwani kapurusan, balu mwani nyeburin, utawi balu mwani boya sentana.

2. Swadarmaning balu inucap patut :

- a. Ngamanggehang pati brata, tan kengin paradara utawi dratikarma.
- na. Nguwasayang waris, pagunakaya tan kengin ngadol, ngadiang makidiang sajawaning sampun polih kabebasan saking pianak utawi keluarga kapurusan.
- ca. Kengin ngangkat sentana prade sampun wenten pidabdab sadurung sinalih tunggil lampus saha kabebasan olih keluarga sane pinih tampek.
- ra. Kadadosang marabi malih prade sampun polih kabebasan saking pianak Daa-Truna utawi keluarga purusa.

3. Balu kabaos tan pageh makadi :

- a. Sangkaning malaksana paradara budi lan dratikrama.
- na. Matilar saking paumahan tan wenten sadok ring prajuru banjar adat/desa adat suenipun awarsa.
- ca. Ngadol, ngadiang, makidiang warisane tan polih kabebasan saking waris pinih tampek.

Yan macihna kadi ring ajeng, balu inucap tan polih upon-upon waris, taler dados katundung saking genahnia

Pawos 55
BALU SENTANA RAJEG

1. Sane kabaos balu sentana rajeg inggih punika :

- a. Mawiwit saking pakurenania kaceburin, kengin ipun mawak purusa
- na. kamulan ipun wantah sentana purusa

2. Balu inucap ring ajeng, tan keni paswara ring paos 54.3.

Palet 3
Pawos 56
INDIK SENTANA

1. Indik sentana wenten 2 (kalih) soroh, inggih punika :

- a. Sentana rajeg
- na. Sentana paperasan

2. Prade tan ngawetuang sentana, kengin ngidih sentana, masrana antuk upakara sekala lan niskala manut sastra Agama Hindu sane kabaos “ Meras Sentana “.

Pawos 57
MERAS SENTANA

1. Meras sentana dudonan ipun kadi puniki :
 - a. macihna antuk Widhi-widana.
 - na. wenten ilikita miwah saksi, sane pinaka saksi kulawarga nia kasarengan antuk prajuru desa/banjar adat.
2. Ngidih sentana patut sakirang-kirang ipun 3 sasih sampun ngawentenang atur ring prajuru desa/banjar adat sadurung dinane pacang meras sentana kamargiang.
3. Prajuru banjar/desa patut numusang ring sang ngawiwenang makadi Kepala Desa, saha nyiarang wewidangania miwah salantur nyane.
4. Taler mangda nganutin pawedar Guru Wisesa minakadi Pangadilan.

Pawos 58
PAPERASAN SANE SAH

1. Meras sentana kabaos sah, macihna sakadi puniki :
 - a. Nenten wenten sane kabهران.
 - na. Nglaksanayang upacara paperasan (ma-Widhi-widana).
 - ca. Kasaksinin antuk sameton sane mameras, prajuru Banjar Adat/ Dinas, tur kasiarang ring paruman banjar/desa.
 - ra. Kasaksinin antuk parasameton sane pinih tampek saking sane kaperas.
2. Sang sane patut kaperas makadi :
 - a. Jadma sane magama Hindu, siosan ring Agama hindu tan kengin kaperas, sajawaning jadm punika tumus ngranjing magama Hindu, malarapan antuk bukti-bukti, saksi-saksi, miwah ilikita saking sang Rumawos.
 - na. Keluarga saking purusa, yan tan wenten, kengin saking wadon, yan tan wenten kengin ring sapisira ugi, yan sampun magama Hindu
 - ca. Kengin meras sentana langkungan ring adiri.

Palet 4
Pawos 59
INDIK WARISAN

1. Sane kabaos waris wantah tetamian sane marupa :
 - a. Drue tengah
 - na. Karang kawis (karang drue ngraga), tegal, sawah, Palemahan Karang Desa (PKD) boya waris.
 - ca. Artha brana
 - ra. Pamrajan, dadia miwah sapanunggilanipun
 - ka. Pagunakaya, tetatadan jiwa dana, utang-piutang, miwah sane lianan.

Pawos 60
AHLI WARIS

1. Sane kawastanin ahli waris inggih kapuni :
 - a. Preti sentana saking purusa utawi wadon, paperasan
 - na. Turunan ka pernah purusa ngunggahang makadi manyama di misan taler mindon

Pawos 61
SWADARMANING SANG NGAWARIS

1. Nerima saha nitenin tetamian saking keluarganya
2. Ngabenang nglantur Ngatma Wedana (nyekah) sang sane nruwenang waris.
3. Naur utawi nampi utang-piutang lan sapanunggilanipun.

Pawos 62
WARIS SANE TAN DADOS PAH UTAWI ADOL

1. Warisan sane tan dados epah utawi adol makadi :
 - a. Mrajan. Sanggah
 - na. Pustaka suci, keris, tumbak, rontal, miwah sapanunggilanipun
 - ca. sane patut ngraksa utawi ngupapira wantah sentana sane ngamong karang ngarep (ngayah ngarep).

Pawos 63
AHLI WARIS LANGKUNGAN RING ADIRI

1. Prade sajroning pakulawargan wenten sang ngwaris langkung ring adiri patut :
 - a. Kawentenan paiguman indik waris inucap
 - na. Yan tan prasida katumusang, tunasang tetimbangan ring dulu-dulu utawi Kerta Desa
 - ca. Prade taler tan wenten cumpu ring panepas Kerta Desa kengin tumusang ring sang sane patut maosang, makadi Pengadilan Negeri
2. Prade kantos nyepih karang druwen desa sang mawicara suang-suang patut nedunin mekrama ngarep.
3. Prade karang inucap kaputungan, patut prajuru niwakang kadi ring sor :
 - a. Sang sinanggeh ahli waris manut paos 60
 - na. Sang sane kengin anggen sentana manut paos 58

SARGA VI
Palet 1
Pawos 64
INDIK WICARA LAN PAMIDANDA

1. Sane patut numusang wicara ring Desa Adat Sibangkaja kawastanin Angga Kerta Desa, sane kaabih olih :

WARNASRAMA DHARMENA 2018

- a. Kelian Banjar Adat, yening sang sane mawicara patunggilan Banjar Adat
- na. Kelian Desa Adat kasanggra antuk Angga Kerta Desa yening sang mawicara patunggilan Desa Adat

Pawos 65
PANYAWIS WICARA

1. Kelian Banjar Adat utawi Kelian Desa Adat rikanjekan maosin wicara mangda kasa rengin antuk krama Banjar Adat utawi Desa Adat, sekirang-kirang ipun 2 diri, seakeh-akehipun 4 diri.
2. Panyanggra ringajeng kasudi olih Kelian Banjar Adat utawi Kelian Desa Adat
3. Prade sang mawicara tan cumpu ring panepas Kelian Banjar Adat –Kelian Desa Adat, mangda kalanturang ring sang rumawos .
4. Wicara sane kabawosin, krama desa utawi banjar sane tungkas ring daging awig-awig Desa Adat Sibangkaja, taler nungkasin sedaging pararem ring Banjar Adatnia
5. Nepasin wicara ngangge uger-uger Tri Pramana, makadi : bukti, saksi, ilikita tur nepek ring catur dresta miwah sastra Agama Hindu.

Palet 2
Pawos 66
INDIK PAMIDANDA

1. Bacakan pamidanda sane kamanggehang Tri Danda makadi :
 - a. Artha Danda : danda marupa artha brana makadi barang, jinah
 - na. Dewa Danda : danda marupa pangaskara bebanten
 - ca. Jiwa Danda : Patut nunas pangampura ring banjar utawi desa malarapan antuk paruman
2. Pamidanda yan marupa artha brana patut kepah tiga, kalih katur ke banjar sane muputan wicara, siki katur ke Desa Adat

Pawos 67
LINTANGAN RING PANUMAYA

1. Rikala sampun waneng ngamedalang urunan, papeson marupa jinah miwah sapanunggilanipun. Yen sampun lintang ring panumaya keni danda manut perarem.
2. Ri sampun keni panikel, mawaneng malih asangkepan, taler nenten nawur, wenang karampag, manut perarem .

Pawos 68
SANE TAN DADOS RAMPAG

1. Sane tan dados rampag makadi :
 - a. Prabot pawon makadi payuk, gebeh, kompor, lan sane lianan
 - na. Prabot sawah, makadi tambah tenggala, traktor, lan sane lianan
 - ca. Bale pasayuban, wewangunan paumahan
 - ra. Mrajan, panganggen mrajan, miwah sane lianan

SARGA VII
Pawos 69
NGUWAH-NGUWUHIN PENYACAH AWIG-AWIG

1. Nguwah-nguwuhin penyacah awig-awig kamargiang, malarapan antuk peparuman agung paos 18 angka 2
2. Pamutus babaosan mangda kautsahayang metu saking pikayun gilik saguluk praya ngulati kasukertaning Desa Adat Sibangkaja

Pawos 70
PICEKET LAN RERINCIKAN

1. Sarga II paos 2 angka 4, Tri Hita Karana manut Tattwaning Bhuana Agung; Parhyangan utawi Kahyangan Tiga, Palemahan lan Pawongan
2. Sarga II paos 2 angka 2, Undang-Undang Dasar 1945, pamekas pasal 18; Indik Pemerintah Daerah, bacakanipun kadi puniki. Pembagian daerah Indonesia atas daerah-daerah besar dan kecil dengan bentuk susunan pemerintahannya ditetapkan dengan undang-undang dengan memandang dan mengingat dasar permusyawaratan dalam sistim pemerintahan negara dan hak-hak asal-usul dalam daerah-daerah yang bersifat istimewa.

3. Rahina piodalan ring Kahyangan Desa Adat Sibangkaja lan Pemangkunian lanang istri :

No	Aran Pura	Rahina Piodalan	Aran Pemangku	Pamitegep
1	Pura Desa	Budha Keliwon Dunggulan	1. I Made Sumanasa 2. Ni Ketut Wanti	
2	Pura Puseh	Saniscara Keliwon Kuningan	1. I Ketut Kerti 2. Ni Md.Astiti Wardani	
3	Pura Dalem	Anggara Kliwon Medangsia	1. I Wayan Itep 2. Ni Made Warwati	
4	Pura Prajapati	Anggara Kliwon Medangsia	1. IGstNgrhDarma Putra 2. Anak Agung Ari	
5	Pura Taman Biji	Sukra Klowon Pujut	1. IWayan Wija 2. Ni Nyoman Trinami	
6	Pura Demung	Saniscara Kliwon Uye	1.I Nyoman Tama 2.Ni Wayan Murah	

PAWOS 31.

9. Indik rerahinan jagat :

- a. Krama desane patut ngaturang pengaci lan pengrastiti ri kanjekan rerahinan jagat, makadi : Somaribek, Pagerwesi, Tumpek , Sugihan Jawa - Bali, Galungan, Kuningan, Budha Kliwon, Saraswati, Siwalatri miwah sapanunggilan ipun.
- na. Pidabdab nyanggra pengaci rahinan jagat mekadi Galungan, Kuningan lan Buda Kliwon Pahang ,manut sastra :
 - na.1. Penyanggra Rikala wuku Dungulan (Galungan).
Ring Rahina Anggara wage wuku Dungulan kabawos Penampahan Galungan ,pidabdabe patut ngemargiang pabyakala ring natar paumahan

suwang-suwang ,, wus punika kalanturang antuk nanceb Penjor ,genahnyane ring tengen lawangania, sejabaning krama sane kacuntakan kalayu sekar.

na.2. Ring rahina Buda Kliwon wuku Dungulan utawi Galungan patut ngaturang pengaci manut dresta lan sastra agama hindu.

na.3. Ring rahina saniscara kliwon wuku Kuningan patut ngaturang pengaci manut kecap sastra agama hindu.

na.4. Nuju rahina Budha Kliwon wuku Paang (Pegat Twakan),krama sami patut nelahin luun Galungan lan Kuningan, saha upakaran ipun, yan wenten sane mamurug patut kadanda manut pararem.

10. Indik Galungan **Kala Rahu** lan **Nara Mangsa** pidabdabe kadi ring sor :

- Yan sasih Kapitu wuku Dungulan asapunika taler nuju Anggara Wage wuku Dungulan, nepek keni tilem, upakaran ipun tan maserana tumpeng, kagentosin antuk serana sodan muah seruntutanya santukan nuju rahina punika kawastanin Kala Rau.
- Yening wuku Dungalane nepek Sasih Kasanga rah 9 tenggak 9, wenang (upakara katur ngangen caru nasi cacah maoran ubi kladi, metatakan daun telujangan (muncuk don biu), muah seruntutanya, katur ring Sang Kala Rau, utawi Sang Kala Gadabah,ri antukan rahina punika kawastanin Nara Mangsa.

11. Indik ring ajeng (wilangan 10) patut taler nyantosang ilikita dedauhan saking sang ngawiwenang, makadi saking Parisada Hindu Dharma Indonesia.

SARGA VIII

Pawos 71

PAMUPUT

1. Awig-awig puniki kamanggehang ring sajeroning Desa Adat Sibangkaja, duk rahina Soma Kliwon Uye, Isaka Warsaning Loka 1913 sasih kasanga, Titi, Pang, Ping 13, tanggal Masehi 2 Maret 1992, malarapan antuk upacara Mapasupati sane kapuput antuk Ida Pedanda Gede Singarsa, saking Gria Suksuk Sibangkaja, saha kalinggatanganin antuk Bapak Bupati Murdaning Jagat Badung; Bapak I G B Alit Putra.
2. Sahananing sane dereng prasida kaunggahang ring sajroning Awig-awig Desa Adat Sibangkaja puniki, patut kamargiang manut sima dresta lan sima krama mangda tan lempas saking uger-uger desa.

3. Manut Paos 69 ringajeng , indik “nguwah-nguwuhin Penyacah Awig-Awig”, indike punika sampun kalaksanayang malarapan antuk paruman Agung Desa Adat Sibangkaja, 5 (limang) warsa pisan, sane kasanggra antuk Bendesa Adat saha Angga Kerta Desa, Perbekel, BPD, lan LPM, para manggala desa pinaka nara sumber, para Pamangku Kahyangan Desa, Kelian Adat suang-suang Banjar Adat taler kasanggra antuk Kelian Dines se-Desa Sibangkaja, Ngawit parum nuju rahina Redite Pahing Gumbreg Tanggal 17 Pebruari 2013 kantos puput nuju rahina Wrespati Pon ,Kuningan tanggal 4 April 2013, Ngawit kasobyahang lan kamargiang ring rahina Redite Umanis ,Langkir , tanggal 7 April 2013, tur sampun kalingga tanganin antuk Manggala Prawartaka mekadi :

Manggala Prawartaka Awig – awig 2018 :

Penyarikan :

(Ida Bagus Ketut Manuaba)

(I Made Arimbawa)

Sampun kasumanggemin tur kacumpunin saha lingga tangan saking Bandesa Adat, Perbekel, Prajuru Adat lan Prajuru Dinas sawewengkon Desa Adat Sibangkaja , mekadi ring sor :

PRAJURU BANJAR ADAT :

1. Banjar Piakan :

(I Gusti Made Warta)

2. Banjar Sintrig :

(I Nyoman Sudana)

3. Banjar Lambing :

(I Wayan Ardana)

4. Banjar Sangging :

(I Made Parwata)

5. Banjar Lateng :

(I Ketut Suarnayasa)

6. Banjar Tengah :

(Ida Bagus Budiartana)

7. Banjar Saren :

(I Gusti Ngurah Subawa)

PRAJURU BANJAR DINAS :

1. Banjar Piakan :

(I Wayan Suena)

2. Banjar Sintrig :

(I Made Sukawana Sumarbawa)

3. Banjar Lambing :

(I Wayan Suyastra, SE)

4. Banjar Sangging :

(I Ketut Yudi Saputra)

5. Banjar Lateng :

(I Komang Gede Bawa)

6. Banjar Tengah :

(I Wayan Supatra)

7. Banjar Saren :

(I Ketut Ruma)

PRAJURU DESA :

Bandesa Adat Sibangkaja :

(I Ketut Narayana)

Perbekel Desa Sibangkaja :

(Ni Nyoman Rai Sudani, SH)

P U P U T